

**Najib Hargai Sokongan Anggota Parti Kekalkan Beliau Jawatan Presiden Umno
Bernama
21 Sept, 2013**

SEPANG, 21 Sept (Bernama) -- Datuk Seri Najib Tun Razak melahirkan penghargaan kepada kesemua anggota Umno yang terus menyokong kepimpinan beliau sebagai Presiden Umno dan timbalannya Tan Sri Muhyiddin Yassin untuk terus menerajui parti.

Najib berkata beliau dan Muhyiddin yang menang tanpa bertanding bertekad untuk menumpukan sepenuhnya kepada usaha-usaha mengukuhkan parti.

Selain itu mereka juga berhasrat meneruskan dasar-dasar perjuangan parti dan pentadbiran kerajaan tanpa diganggu soal pertandingan dan asakan daripada mana-mana pihak.

"Ini menunjukkan sikap bertanggungjawab keseluruhan anggota parti dalam meletakkan jawatan presiden dan timbalan presiden sebagai tonggak kekuatan parti," katanya.

Beliau berkata demikian pada sidang akhbar sebelum berlepas ke Amerika Syarikat bagi mengetuai delegasi Malaysia ke Sesi ke-68 Perhimpunan Agung Pertubuhan Bangsa-Bangsa Bersatu (PBB) di New York dari Kompleks Bunga Raya, Lapangan Terbang Antarabangsa KL (KLIA) di sini Sabtu.

Hadir sama pada sidang akhbar itu Muhyiddin, Menteri Kemajuan Luar Bandar dan Wilayah Datuk Seri Mohd Shafie Apdal, Ketua Wanita Umno Datuk Seri Shahrizat Abdul Jalil dan bekas menteri penerangan komunikasi dan kebudayaan Datuk Seri Dr Rais Yatim.

Najib berkata meskipun perlembagaan Umno telah dipinda yang sekaligus menjadikan parti itu lebih terbuka dan memudahkan sesiapa mencabar kedua-dua jawatan itu, anggota Umno bertindak matang dengan meletakkan jawatan presiden dan timbalan presiden sebagai tonggak kekuatan parti.

Menurutnya anggota-anggota parti berpendapat kedua-dua jawatan itu amat penting diberi sokongan sepenuhnya agar kekuatan parti terus dipelihara dan tidak terjejas.

"Saya ingin mengucapkan setinggi-tinggi terima kasih dan penghargaan kepada semua anggota Umno di semua peringkat yang telah memberi sokongan yang begitu menyeluruh sehingga sehingga proses demokrasi terbuka dalam parti kita berjalan dengan begitu baik dan sungguh terkawal," kata Najib.

Beliau juga berharap bagi jawatan-jawatan lain, pertandingan akan berjalan dengan lancar tanpa sebarang perkara tidak diingini.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=979493>